



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Benedicti Ariæ Montani Hispalensis Poemata**

In Qvatvor Tomos Distincta

Humanæ salutis Monumenta, & Odæ variæ

**Arias Montano, Benito**

**Antverpiæ, 1589**

In tabulam Christi Apostolos legantis. Ode XLVIII.

**urn:nbn:de:hbz:466:1-44973**

In tabulam Christi Apostolos legantis.

Ode XLVIII.

Sæclorum veterum, præscripto ex ordine, finem  
 Certa Deo voluentibus annis  
 Tempora prorulerant; hominum quoq. magna per orbem  
 Strata seges matura iacebat;  
 Agricolam iam cana suum cum terra vocaret,  
 Et falcem exspectaret acutam,  
 Redderet ut foetas seruandi farris aristas,  
 Sed culmos quoque rursus inanes:  
 Tunc Domini messis natus, summusque minister  
 Orbis imago auctorque nouandi,  
 Selectorum operi tanto, duodena virorum  
 Ora tuens, sic fatur amice:  
 O mihi præchari comites, sociique laborum  
 Arcanique sacraria magni,  
 Non vos parua manent discrimina, vertere missos  
 Terrarum moremque modumque:  
 Queis maris horrifoni fluctus, ac dura viarum  
 Sunt adeunda pericula sæpè:  
 Non ut Erythras gemmas, ostrumque superbum,  
 Numorumve paretis acervos;  
 Sed magis ut nudi atque inopes, patriaque remoti,  
 Vexati, instabilesque, vagique  
 Vulpibus infestisque, lupisque rapacibus, agni  
 Imbelles, blandæque columbæ  
 Sitis, lux tenebris, nimiumque furentibus ægris  
 Fomentum medicique fideles.  
 Ite igitur fortes, & me duce & auspice magni  
 Consilium curate parentis.  
 Aethereas sperate & opes, æternaque sedis  
 Sceptra meæ, & conuiuia mensæ.

LAETISSIMA ORBI LEGATIO.

Tonia debilibus superantur, maxima paruis:  
 Viderat hoc demens mundus, & obstupuit.

MAGNI CONSILII NVNTIO  
 SVMMO S.